

紅蘭逸乘

地 220.175
936

170
0.30

中国书店标价表
册数 定价

四	紅
卷	籐
渭士登題 	逸
	乘



紅蘭逸乘

凡例

- 一 無稽之言不錄
- 一 他書多見者不錄
- 一 郡志已載者不錄
- 一 凡他邑之事有關吳中者悉采以備參攷

長洲張霞房輯



紅蘭逸乘凡例

一 吳中掌故叢書

江蘇省立蘇州圖書館輯

紅蘭逸乘

長洲張霞房輯

序

紀吳中故事者左氏吳語之文波瀾舒卷有典有則次之若越絕書吳越春秋俱古藻紛披蒼秀欲滴繼之者不亦難乎三國至唐代有紀述而流傳絕少宋范文穆始蒐羅遺佚纂述成書明則盧王二志翦裁有體足爲模範予謂修官書與閉戶漫錄者不同今年春曾有友人強邀入修局志予未之往是稿藏之巾箱僅爲稗野之支談而已矣李青蓮詩吳王舊國水煙空香徑無人蘭葉紅書之名蓋取諸此姑存之以俟博雅者就正焉長洲張霞房識

泗水入修局
志將入局修
志或入修志
局之誤

紅蘭逸乘

目錄

卷一

古蹟

卷二

遺聞

卷三

咫述

卷四

瑣載

長洲張霞房輯

紅蘭逸乘目錄

一

吳中掌故叢書

江蘇省立蘇州圖書館輯

紅蘭逸乘卷一

長洲張霞房輯

古蹟

姑蘇臺者吳王齊立所造也昔吳王璧羽嘗與楚戰種弗利而百姓疲敝王將卒有六甲書見吳之分野王訓其子齊立曰烏乎主嚮罔欲保厥國民嚮弗欲保厥家強國罷民國卒越弱公素予多事于楚邦厥一作惟民底疚天式示象六甲書見于我吳陰陽靡已罔分節候靡已罔配政教靡已罔布農時靡已罔授侯逞于式師敵北我克尙匪仁君逞民悻焉攸往利余疾屬綢繆漸爾惟保太王之統緒無底失墜余於地下懷爾勳從茲以往爾姑蘇我民乎烏庫罔違於余言國乃昌子孫其吉民父而或匪後言訖屬續太史藉之藏之玉牘齊立于是起姑蘇之臺以誌之後十餘世巫臣復通吳于上國而楚人懼

緝柳編

金姆橋在城中通關坊其地古有關也昔吳王齊立好道王母嘗與齊立會于此命仙女房奴歌毒南之曲彈橐鉢之琴後人名橋爲金姆卽西王母也

右二節俱見漂粟手牘非越絕書吳越春秋所有也璧羽一作闕羽六甲星名在紫微垣齊立二字見禮記文王世子篇古者太子齊立以養也二君在壽夢前故不著於春秋

鴟夷二年園中雨石大者方圓丈餘小者亦大於拳雨及數里不傷人屋後亦無他至今葑門內里許有

大石是其遺蹟也亦載漂粟手牘

昔渡僧橋未造時恆有小舡于此渡商賈界二錢孫權時有比丘欲渡舟人先索錢僧故不與舟人叱之僧怒折一楊枝置水上履之而渡若平地也于是諸商賈爭牽衣拜之多出金造此橋因號曰渡僧緝柳編

乘魚橋下昔有深水今不復爾矣丁法海嘗浴於此見一大鯉甚馴戲跨之忽躍起化爲龍飛入雲端明日法海貽書友人言赴琴高之約于大言之山看日出五百年後更當來此

孫權時吳中大疫有一老翁憩於橋上衲間掛藥瓶數枚各有識或曰不安殺人或曰孝或曰悌之類言瓶有神藥轉死返生求治者不取價但諦視其容色如孝悌者若慈悲者各以類界之人皆服其藥識愈幾千人或爲人逆而忍者不應後老翁不知所之今吳中憩橋是也

支遁好乘馬其最重者名曰頻伽嘗飲頻伽於橋下馬洩處忽生蓮花人異之故名橋曰飲馬而橋之西南有蓮花巷

黃牛坊橋始成時夜半月下黃牛在其上有喘聲居民視之化作一小龍躍入橋下明日有西番僧至此曰橋下有寶氣解衣入水得玉龍一枝輕黃色製極精妙人欲奪之僧遂行其人足不能行跬步僧遠不可復追始得行至今稱黃牛坊橋或云戴若思雙柑斗酒聽鷓鴣處故又稱黃鷓坊右俱錄吳郡志桐薪云

枚庵名望鳳
家伊仲吳人

泗水黃氏太淵
黃氏堂側亦有
項王廟跡亦以
黃氏王廟故邪

宋有黃由狀元居此建坊後誤爲黃牛坊然郡志黃由係吳江人有狀元坊在城東南隅其說謬矣
吳子城甚小今之吳宮當作吳股而東西天王堂係子城鼓樓基今鼓樓坊猶存舊名通關坊東土岡迤
邐蟠繞猶見城基吳枚菴云吳股者出城之路也

白塔子巷有白塔雕刻佛像今在人家壁中

吳周公瑾故宅至宋爲雍熙寺又明時分其半爲吳郡城隍廟廟中掌庫神祀陸伯言廟外俱明廣孝阡
也

申文定公祠在流化坊舊吳縣署也遷署而建祠故今里東有吳縣西橋俗名流化橋城隍廟東有馬坊街及獄
牢遺址今皆爲民房矣祠中有三間亭及池松柏婆羅成林祠前有棋杆國朝乾隆辛亥被颶風所折
太湖中鼇山形如鼇而中虛巨浪歎吸驚濤激雷其下多鼇其上有野廟在荒榛之中昔湯文正公燬上
方五聖廟五聖之精逃匿山腹村巫私祀之

昔吳淞潮甚猛號霸王潮俗訛傳楚霸王爲厲唐時沿江立漢功臣七十二廟以鎮之蓋何紀信輩
康王古廟在鐵瓶巷北志云周康王廟并附會以刑措之說未可信也按說鈴述異記亦載杭州康王廟
以爲司虎之神殆因有虎患而祀之癸辛雜識云宋元以來平江多虎患也

唐洞庭君柳毅墓在西街五峯園之樓下久已蕪沒有人居人晝臥見車馬騶衛入室有美丈夫緋袍玉帶

上堂忽不見駭而掘之得碑及金經懸樞知係柳君所葬不敢犯而止見太倉王吳當恕軒偶筆今郡
中白鶴三鄉廟水仙王廟皆祀柳君也 醋庫巷水仙廟香火極盛堂前有方池頗深乾隆年間賽會
觀者擁擠有五歲嬰兒墮入深池浮於水面衆見而拯之手中糕餌紙包猶未濕兒言水中若有人托
其背者絕不驚怖其靈祐如此

堅瓠集云予親見長洲縣署露臺下西階甃石是蕭景贖仗義英風之碑

莎衣仙淮陽胸山人宋孝宗賜號通神先生周牧安筆記云墓在齊門外蠡口本號攝冢俗呼歐塚

郡城東南三十餘里名陳墓湖州府志云宋有陳妃葬此又云宋有好奇之士曰陳震居此近呼池墓

雲窗私志云呂蒙讀書臺開西館以延俊髦共相挖揚朝夕稽考識見日進吳大帝益重之今西館橋是

也府志作西貫橋

雲煙過眼錄載宋趙伯驥桃源圖乃吳中圓妙觀圖也可想宋時觀中多桃花亦若唐時長安元都觀矣

元趙子昂書山門記碑眞者在松江而吳中所在係翻刻耳圓妙觀唐時爲紫極宮宋稱天慶觀山門碑

文格公志載之觀前街舊名碎錦街有橋對觀者名碎錦橋錢補履云康熙年間居民鮮少立橋上望見張王

府基一片荒烟蔓草今川慶閣撲地掛轡駕肩矣三清殿有吳道子畫老君像碑龐眉披髮貌極蒼古

宋寶慶年間道士馬大同立又有宋嘉定戊寅一碑在楹桓前明洪武時奉詔蠲觀中賜田租碑方正

學書碑在今行宮中其碑文明永樂時磨去俗說劉海掃去可笑之甚
蕭王墓在蕭家巷蓋齊梁時貴人葬地因居民造屋掘得古碑而知之近年又聞掘得碑云唐相盧公之
墓未知何人

鳳池園在蕭家巷中園極大池亦廣今分售其地爲三姓所有卽元邑神廟亦其餘地

雪糕橋昔張孝子搏雪爲糕以奉親所居在蕭家巷祠亦在焉其事詳見廣新聞

蕭家巷陳氏園地中卽張孝子墓處

大儒巷以明王仁孝先生所居得名也其祠在護龍街大關廟側所著有俟後編國朝康熙間彭南昀太
史梓行之

城南開元寺後有藏經閣以磚石累成不用梁柱俗呼無梁殿分三門曰阿修羅曰毗奈耶曰瞿毗曇其
閣並無經焉有燕國夫人像蓋吳赤烏年捨宅造寺之人也又長署南有燕家浜府志云昔人於此得
石函刻字云燕國夫人首級蓋葬於此是也

盧安山醒已編云寺中舊有三官殿乾隆初年寺僧乏柴斧而薪之矣今遺址存焉又有地藏殿十王
殿所塑無常鬼王甚靈常夜出往來地南人皆見之又有臥佛卽如來涅槃雙樹像也

元趙松雪云北禪寺主僧正吾號南屏藏定武蘭亭是其師晦庵照法師所藏從其借觀不可夫正吾之
珍祕蘭亭幾與辨才相似乃松雪借一觀而不許亦太吝矣

孫溪朱氏讀書望田樓在楓鎮之南嘗聞處士昆玉耕讀築樓在孫武子橋聚族而居

西洞庭包山寺傍有竹園宋朝某菴禪師臨化時手插一枯竹杖於庭後遂生枝葉成竹林矣

明萬曆年間閭門內專諸墓壞居民起出石幢一座高僅三尺許四面刻毗盧遮那佛像三面並作思憶
相一面撒手不知何代物也今歸寒山

虎邱千佛閣傾圯不可爲遊者無不仰嘆殿學申公捐貲鼎新一日有匠人詣寺自云能整齊之請具香
燭花果冥鏹列數百燈夜與同伴三四人閉戶丁丁不輟及曉巍然如故矣一云越東異僧來敲正之

府治東有東西兩天王寺唐大歷三年托塔李天王白晝現形其地居民共募造寺中有熾盛光王佛毗
盧觀音像其二十八宿猶是唐朝夾紵舊物石韋狀像尤古

趙居士宦光儲黃山人習遠遊洞庭東山法海寺見殿東棟間懸一巨篋訊諸老衲云軸子在內自入教
以來三十年矣未有開展不知何軸居士使數百人百計開展乃是陀耶入泥洹畫像也天龍八部人
非人等皆號咷踴躍悲慘莫可名狀圖方廣二丈餘一幅素爲之題平江府造四字而無歲月鑒定爲
宋政和時物於是率同遊作禮于庭草間嘆未曾有

黃土塔橋明祝京兆嘗宿於其旁有聽鼓記一篇據云府署鼓聲今以理側之當係吳縣署中鼓也若府
署在二里之外而云聽之歷歷祝公雖耳聰勝人恐亦未必能如是 地云黃土曲故塔亦云郡中塲

塔凡七此其一也

元妙觀西劉進士宅中有石井欄銘曰宋朝寧國寺井蓋其寺址也此寺蕭燬于宋末兵亂今宅前竹葉
瑪瑙旌杆墩及門旁滾石俱舊物

船塢巷口井欄石有宋咸淳戊辰年任山明叟立書法甚佳

西美巷宋井有銘字已載竹汀先生日記中矣予觀其銘稱永定鄉乃知今鐵瓶巷有永定寺係鄉名也
鈞玉巷淮張時宮人埋玉之地也故近王府基

勾欄巷今稱幽蘭巷予聞朱西生云前朝妓家所居

張王得美人擇其最姝麗者貯以蕙香桐芳二閣今桐芳巷在城北隅

中和道院在宋亦係雍熙寺址今分西偏作郡城隍廟東偏仍爲寺而在三國時皆周公瑾故宅也有手

植古柏在道院之古柏山房銅皮溜雨黛色參天撫其老幹半化黃石矣

天宮寺在陸家巷明末有趙凡夫范長白沈朗倩徐照發文文起陳古白蒼雪和尚張以中邵瓜疇陸青
章等結放生蓮社於此崇禎時譚元爲住僧元若禪師畫掩關圖卷前有眉公書息影僧誦四大字後
有沈建趙雨李瑩杜大綬馮夢桂朱篁姚宗典周師文褚篆劉錫石胡汝淳周永年鄭敷教匡崖金俊
明顧善周茂蘭僧天童圓悟題詩不寐道人凡二題一在明末一在鼎革之後

白鶴觀記一卷康熙間郡中鴻博馮最撰并書今墨蹟猶存觀中福濟觀崇禎宮道房俱有志亦若僧家
之分南北宗

衛前太公廟祀尙父而白起關壯繆祔焉或云古之旗纛廟也唐時武廟祀尙父而白起與關侯列六十
四賢中

圓妙觀石觀音殿乾隆甲辰葺門彭氏重修予家助銀二百金大士始裝金焉石像向在牆中不蔽風雨
俗稱露天觀音

顧氏依園中有梁妙嚴公主墓楓林蕭瑟池水寒瀟遊其間頗有幽靜之致墓上爲妙嚴公主臺前有妙
嚴泉繞以妙嚴池今售於錢氏改武肅分祠矣

春草間房在雙林巷金俊明故宅也乾隆年郭祭酒居之予嘗過其家題云不寐道人去草堂依舊閒盆
池添水綠石筍到秋斑淨業歸眞際風高杳莫攀老梅留書稿偃臥曲闌間予嘗得不寐道人畫梅冊
十二幅清逸奇古頗近邵瓜疇今寫梅者罕有倣之

二株園在周五郎巷明徐勿齋先生宅也揚維斗諸公會文之所花木之盛與范家園爭勝藝遠山業師
買得二株主人石印欲磨去適談二瓢見之歎賞鐵筆篆法之妙乃不磨留之

石馬菴在雙林巷口有宋高宗妃留滯平江歿於此曰娘墳墳上石馬歲久靈奇常下岸飲水被人擊

去首想此菴卽其香火院也

查先生巷昔有查先生精于黃白之術嘗居此見江淮異人錄

穹窿山麓拈花菴卽福臻禪院之故址也建自梁天監二年在宋爲韶國師道場明永樂間敕賜爲建忠禪院明季頂日徹師又爲庵

周孝子廟在孝義坊廟中有蓬萊井疫歲虔禱于神汲泉飲之可免有神緒面黑鬚控馬者曰顧太案顧太係國初人業顧繡生平敬祀周孝子歿爲執鞭今凡學繡者尸祝焉曰繡祖而祀以方糕蓋所嗜也春申君廟在鐵瓶巷中神像之旁有皂班曰尹阿爹乾隆年間人爲吳縣伍伯者也或云生平正直好義已諾必踐歿而塑像人家有失物者往禱祀以燒酒腐乾并書失物之本末粘其竹片則夜間竊物者必受責撻

羊山一名蒸山以雲氣之常如蒸也吳越春秋吳王夫差殺公孫聖提之蒸邱卽此山戰國策云越王勾踐以散卒三千擒夫差于干隧今萬安鄉有遂山卽其地

張七公土地廟在潯關祀晉張季鷹祭用尊醢

夫差大王廟在葑門外車坊昔吳王造車處

乾隆丙午葑門外耕者掘得古墓碣云吳興沈萬二之墓知係萬三之兄疑有財寶爭先入壙及入則

壙大如三椽屋一棺之外別無長物遂重封檢之嘻象以齒焚翠以羽戕萬二智勝萬三遠矣太倉嘉定縣志云沈萬二名真一安定人富甲一郡明洪武太祖作詩云百僚未起朕先起百僚已睡朕未睡不如江南富貴人日高丈五猶披被萬二聞之嘆云兆已萌矣卽以家貲付幹僕掌之買巨舟載妻子汎游湖湘不二年江南豪右以次籍沒獨萬二以令終夫不十人不足以葬崔子之柩不得隱藏由其有拱璧也楚白公罪同崔子何以卒匿其屍哉無寶故也觀萬二之營壙當不止十人而葬而莫知焉可悟璫璣之不可殲矣

中峯寺在支硎山韓補瓢筆記云中峯巖壑深秀處爲冬青軒何義門先生幼從三近邱師讀書其間壁脚東塗西抹皆其手蹟寺僧以其名重不忍拭去其髻年題壁云清溪十里瀉奔淙尋到源頭出梵鐘山雨欲昏林外塔輕雲不掩閣前峯讀書人去巢餘鶴入定僧歸鉢有龍閑掃落花扶瘦竹深山無事不從容又有十九日拉伴山峯觀覽小雨急歸云越山吾所愛一雨罷登臨小得蓬窗韻全乖蠟屐心無聲宵漲閣有影曙峯深好訂重來約情于到未尋又一首云牢落中峯寺無僧竹樹清矮牕看山色高枕聽溪聲又二句云清坐北窗無一事閒看小鳥捉飛花詩後咸書焯字爾時入法未工筆姿端正雅秀頗似閨秀簪花體格

明初王賓^吳輯虎邱詩一卷載元郝經詩云虎邱山前新築城虎邱寺裏斷行人呂敏詩云山上樓臺山

下城朱旂夾道少人行曾朴詩云闔閭塚上見新城無復遊人載酒行其年乃至正丁酉淮張用事周南老詩云白髮趨公役馳驅上虎邱又云四疊新城繞劍池劍池池上碧崔嵬蓋南老方爲澤門之哲董其事也虎邱古名海湧峯必有危巒列岫之勝乃夫差築墓于前士誠造城于後遽壑雲巖剗削不遺餘力豈復廬山眞面目耶嘗見明文衡山唐六如文嘉袁尙統居節所寫虎邱圖皆畫後山景聞前輩云明朝虎邱山門在今後山也嘗題劍池云飛去魚腸劍池空石氣涼古桐高百尺宿雨滴寒香荻樓雜抄云張香橋昔有女子姓張名香與所歡會此故云今月明之夜有兔大於常兔見於橋上人捕之不得殆兔仙也所謂張香想非恆人不然世之桑間濮上者頗多何以得名耶

顧市巷顧雪窗先生居之明人也教授於此歸者如市里人目爲顧市有管先生能作反手書嘗爲先生書一絕句於庭牆筆致甚奇今不復見先生光福鎮人載緝柳編

明王文恪公宅中芳草園今已荒蕪矣頽垣尙有忘庵寫墨牡丹遺蹟相傳忘庵嫁女寫花卉百幅爲隱贈較古人練裳竹筍更爲清雅忘庵畫予嘗見其早年作者款書王武或書王憲武或云名會者其弟也名書紳字鶴孫其子也俱工花鳥嗣其家法

會職作位

西街道遙術高殿庵比邱尼居之秋日桂花頗盛遊履紛紛中有古墳殘碣苔封不可辨尼云宋蘇小妹埋香處

虎邱桐橋下有銘云元至正十五年金氏十一娘捐資建造又廣化寺橋南境有井銘嘉定改元六月閨門外有種痘祖師廟昔聞先伯萍廬公云種痘祖師爲峨嵋眞人居蜀峨嵋山始教人種痘者蓋仙也柴河頭湯氏照牆有中山世里四字明范允臨書此宅係永福寺故址

婁葑之間有匠門塘匠門一名干將門其東有歐冶廟干將墓此門之所以名匠也載張楚門筆記嘉慶丁丑秋千將坊浚井得巨人骨或云干將埋骨處若其墓在匠門安知井中非莫邪骨耶

太湖濱香山有漢會稽太守朱買臣廟其貧困時採樵處也墓在浙江嘉興府東塔雷音閣後卽廣福講院案買臣見棄于其妻自係實事而潑水難收則古烈士傳齊太公妻馬氏故事也

太湖中馬蹟山昔秦始皇南巡曾登此今有馬蹟焉

蘇州府署正堂後隙地掘之如有覆夏屋者造屋其墟卽有火災案漢時因太守堂屢災遂塗以黃名曰黃堂正其地也或云下有春申君冢然攷地志春申君墓自在常州府之江陰縣君山麓不在此也

府署後有園卽古木蘭洲也宋談元先生云吳中無荔支獨此園有之昔太守孔公嘗取鮮荔支設宴并

繪圖賦詩

虎邱一樹園薛徵君一瓢別業也樹前有池環以林木竹石登樹而憑眺如臨鏡奩塔影山光歷歷入畫予有詩云一瓢居士此爲家水榭淩波石磴斜尙有客來敲屈戌時聞舡過奏琵琶碧苔暈冷金魚洗

紅杏花交玉畫又不見主人倍惆悵半畦藥草又生芽

師子林元天如禪師所築也疊石疏泉皆出倪高士故玲瓏奇險得峨嵋雁宕景趣後之造園者莫能及也予聞內姪太倉陸蘊真云雲林既疊此山又以餘石疊於婁東人家今爲孝廉方正錢氏所居奇石林立亦得畫意又聞門人伍宗扶云師子林國初屬伍氏

樂橋之南大石頭巷不知大石所在一日值其巷口人家葺屋始見石在屋中正方如八仙桌其石質砂石耳俗傳孫吳時空中墮下者也

吳下大水歲饑多是納音屬士之歲如至順庚午至元戊寅至正丁亥洪武丙辰理不可曉出農田餘話浙中天目山神形如白虎每歲五月與震澤龍鬪則多暴風雨或云會龍女也

陶貞白別錄蘭州出太吳池澤又云太伯所居故曰太吳

三吳記孔安國問宅忽有二人來云自帝庭來謁一衣綠曰藤子一衣黃曰黃子與語吳大帝時事歷歷可聽及去遣人尋之入未央宮庭中衣綠入於藤下衣黃入於橘下案此則見唐人五色線所云孔安國在吳大帝後必非西漢安國也云未央宮庭亦非西漢之未央必於吳事關涉故人三吳記姑存之盧氏雜記有達僚差軍將於浙西買太湖石軍將申狀云前件石蛙蚪二字不堪買五色線潛夫論邊議篇云范蠡收債於故胥蓋胥者舜臣名佐禹治水有功封於吳者也太湖中有故名其地曰

故胥後世轉音爲姑蘇而胥門之名見於左氏春秋非因伍子胥得名也姑蘇臺圖經亦作姑胥臺越絕書又有胥母山似胥母所居

西子隨陶朱公去不知所終惟山東肥城志云西施洞在牛山蝙蝠洞西昔陶朱同西子登此山隱焉共山

有三十

予謂東坡詩載去西施豈無意恐教傾國再迷君殊寓忠愛之忱而猶有未盡者蓋朱公知句踐長頸烏喙難與久居身既見幾而作恐西子他日華落愛淪貽他國扇秋風之嘆不如攜手同行如神龍之莫見其尾耳

周旭筆記云廣化寺計五百畝相傳隋駙馬孫瑋尙文帝愛女妙嚴公主薨葬閭邱坊巷今息園中又云捨宅爲寺今孫家園禪興寺其遺址也廢又載海東一老集所辨以爲梁簡文帝女爲賊臣侯景所逼辱景伏誅後公主染緇削髮轉僑旁郡終於是焉或云梁武帝女疑不能決乾隆時人有發其冢得兩缸相合啓之骸骨已成灰可信公主之爲尼而周旭之說非矣但未知爲梁何帝女耳孫瑋別有墓及宅蓋在鄰近也

朱處士昆玉名鼎鉉偕隱孫溪優游杖履日與鄉鄰耆碩詩酒唱酬里人稱二朱先生箸有望田樓集好讀經史參稽自娛得失嘗謂子孫能守耕讀於願已足公墓在金山之麓童子門下至今里人呼朱家山

宋人題二朱先生我愛朱處士三吳居中央罷亞百頃稻西風吹半黃
又題望田樓我昔造其室羽儀鸞鶴翔交橫碧流上竹映琴書牀出俗無近語竟舜禹武湯

中国书店标价表
册数 定价

中国书店标价表
册数 定价

紅蘭逸乘卷二

長洲張霞房輯

遺聞

論衡譴告篇云太王亶父以王季之可立故易名爲歷歷者適也太伯覺悟之吳越採藥以避王季使太王不易季名而復字之季太伯豈覺悟而避之哉又云太伯見王季有聖子文王遂託採藥荆吳斷髮文身後古公薨太伯歸王季以位讓之伯三讓曰吾刑餘之人不可復主矣

穆天子傳云赤鳥氏先出自周宗太王亶父之始作西土封其元子吳太伯于東吳詔以金刃之刑賄周室之璧封其璧臣長季綽于春山之崖妻以元女詔以玉石之刑以爲周室主據論衡之說則太伯之讓與史記吳越春秋合若穆傳所記則太伯之封太王封之豈因採藥而遜乎

羊山舊志云山別名四飛以四面視之勢若飛動也吳都賦云秦餘標其四望一作飛今吳都賦無此句又云秦始皇時有高人曰管仙人隱此故曜山一名管山

沙河塘築于宋致和年間故號致和塘明况太守修之時有種河旁爛田者頗出怨言太守使工人謳曰太守築沙河恩多怨亦多請看十年後恩在怨消磨國朝康熙年間又修其化緣冊舊藏予家前有彭南畝尤西堂二序墨蹟

楞伽山前海潮菴有蛟穴俗傳吳王夫差葬處非也夫差墓在秦望山尤西堂太史已辨之矣宋談元先

生與菴僧投契僧導以觀蛟穴竈戶欲啓鑄僧不可曰此中潛達旁通幽軸窈窕往太湖底聞波濤舟楫在人頭上行久可達林屋洞天

三餘帖云姑蘇城街潔淨爲天下第一古語云蘇城街雨後看繡鞋

府志測星有孔雀星而所繪圖無之蓋孔雀星在南極圖非中國所得見也

吳城之水其自西來者潏然清徹向東北流與海潮相吞吐則色赤而性濁城西南之水近接太湖溯源苕霅得浙水之餘潤耳

水之氣冬暖夏寒洞庭山在太湖之中秋冬水氣上蒸則霜雪不能殺物而橘柚諸果尤宜

吳城烟火奚啻百萬鱗次櫛比嘗聞遠遊者云天下如此都會如京師外惟揚州杭州漢口臺灣廈門諸處及廣東省城耳

他處女裙俱右掩左獨吳中皆左掩右相傳元兵破吳城之先有將素與吳妓通曰兵入城見左掩右者免妓得信遍告所親婦女效之遂成風俗

正德時吳中淫雨爲災高下湮沒好事者戲謠云閨中少婦不知荒猶是偷情暗約郎寄語郎來今更便紅頭恰好湊奴牀一時傳爲笑談見雪菴詩話

三餘帖馮布少時絕有才幹贊于孫氏其內父有煩惱事輒曰布代之至今吳俗謂婿曰布代

吳俗譏人恆曰鵝頭謂其頑傲類之也出潛居錄

嘉蓮燕語吳俗遷居預作飯米下置猪臟共煮之及進宅使婢以箸掘之名曰掘藏闔門上下俱與酒飯及藏謂之發藏歡譁竟日後人復命婢臨掘向竈祝曰自入吾宅大小惟康掘藏致富福祿無疆掘藏先祭灶神然後食之又曰江南婚娶新婦初至合巹後即用牛蹄筋作羹以豕肉作骰子大和作飯送新婦食謂之金羹肉食筋作金肉作玉吳音玉肉俱作入聲

吳王之女名二十故吳人諱二十曰廿廿音

陸長翁嗜食蟹恆持一螯咀嚼時許雖有急務必盡之乃應故至今飲食遲人輒謂曰汝豈喫蟹飯耶出緝柳編

洞庭山金頭蜈蚣螫人甚毒而閩人嗜之購爲珍饌如吳人之重燕窩也歲產千金而吳人莫敢食也果之珍者白奈橙橘之屬絕佳尤重白楊梅宴客作羹重魷臟蓴菜秋深蓴爛曰蓴酥味尤甘而蓴菜結子鮮紅若櫻桃味甘極寒在烟波浩渺之區僅飽鷗鷺之腹而已

遊林屋洞者須俟秋深龍蟄水落石出始可入洞見石床石枕潛窟洞壑清潔如洗是爲龍女之宮不可再進若窮其境卽有白蝙蝠大如箕來撲炬矣又凡遊者必遣人立洞口不許人在上放爆竹若放則洞中人必震死其壁上題名沈歸愚後又新續數十行予友張解元曾遊焉

穹窿山道觀施鍊竹真人所募捐也真人玉印冠履袍帶留爲法寶永鎮山門每夜神燈如連珠鬼神恍惚人不敢妄行

太湖中石公石母在石公山遊者往尋于林壑間不能驟得遙呼之曰石公石母聞遠山中有應聲尋之卽得

林屋洞天夏寒冬暖每逢大雨或濕霧則洞中乾燥

虎邱千人石上舊有二仙碑乃呂純陽陳希夷像也久爲藤蘿所掩也乾隆時有洋船失風至一所忽有二人來附舟曰順風將至速修檣帆言訖大風忽起二人坐艙首未幾大風送舟至內地二人告別問其姓名住居曰陳曰呂住虎邱山千人石上洋商到虎邱尋之乃得二碑於是捐金造亭焉乃二仙亭也

宋紹定戊子虎邱水涸人於石扉上見二詩云望月登樓海氣昏劍池無底浸雲根老僧只恐山移去日暮先教鎖寺門劍去池空一水寒遊人到此憑欄千年來世事消磨盡只有青山依舊看

沙湖塘有碑廣四尺許長四倍四面刻之三面刻相視歌歌有前後皆築塘時慰勞語今僅見東面記民謠曰遠挑新土纔希罕露盡黃泥始罷休兩岸馬槽斜見底中間水線直通頭宏治丁巳督理浙西水利工部主事姚文瀨立石

菽園雜記云吳中鄉村所唱山歌大率男女情致而已惟一歌云南山腳下一缸油姊妹兩個合梳頭大個梳做盤龍髻小個梳做黃籃頭不知何意朱廷評嘗以問予予之翌日報云此歌得非言人所業木同厥心惟趣向之稍異則其成就遂有大不同者朱云君穎悟過人矣

陸深豫章漫抄云吾鄉諺云斤九釐以目時人之精慧者不知所本戈陽德興產梨頗大有至一斤九兩者土人謂之斤九梨蓋取其類之大者言之猶芋魁也

地志云呂蒙正噎瓜亭在洛陽府城南蓋微時拾遺瓜於此建亭示不忘也其父龜圖多內寵與其母劉氏不睦并蒙正出之窘乏與溫仲舒讀書洛陽之利涉院土室中及登第乃迎二親及其妻宋氏傳奇以母姓爲妻姓土室爲破窰由此附會也今吳城碧鳳坊有蒙正讀書臺予問里人皆云坊有窰基衝卽破窰址也醋坊橋南有落瓜橋蒙正微時逢賣瓜者乞得一瓜方食失手墮水自嘆命窮大哭而去後乃建橋於此更附會之附會矣又王夢樵云呂文穆公祠在醋坊橋爲居民所佔幼時猶見遺像今無從考矣碧鳳坊有讀書臺前垣外有古井風雨之日每夜見燈光如連珠從空入井相傳呂公金絲燈久入井中成精又乾隆時有仙樂從天而降八音咸備入井中夢樵目擊其事予謂祠屬東萊則臺與井想必東萊遺跡

萬歷壬子冬十一月十九日海潮寺中火起佛樓須臾火滿殿有病僧臥韋馱旁此像係大智禪師裝塑

高可數尺忽作人語叱僧曰火來也尙不速走乎僧不覺躍然而起曰我狀老爺出去其行如飛僧不覺重置山門外明日六七八人昇之不動自後病僧頓蘇出猶園

桐鄉辛丑進士朱聲鼎云蘇州同年汪尹之弟病臥園中值中秋月明人靜聞牕外笑語聲須臾見數女子連袂豔粧披帷而入汪問之答曰妾等七人皆吳王張士誠之妾也齊雲之變同日殉節上帝憐之封爲七聖此園乃七人埋玉處君疾瘥可捨此地爲香火地可勿藥愈矣病果愈改園爲七聖院虔奉香火見東軒述異記

吳逸帆漱芳閣志乾隆五十三年五月太湖石公山下漁人捕魚覺網起大重注視之有錢索入網中引之不起得五六尺不動矣益以五十夫猶不動加牛十二頭始動引至十餘丈水波撼動山石俱震有物如蛇頭大如甕冒水而出目開如鏡與日爭光衆方大駭物迅躍而去五十夫與十二牛俱墮水死蓋柴軼夫所述也

己丑九月有人於千尺雪得白龜大如錢又一蟹大如棋子又有一物形如半蛤或云卽耶君子然與本草不合

堅瓠集承天寺廢于中丞洪公因斥逐淫僧也今有刊碑示禁焉明季僧積粟多患盜告官捕衆屈殺句容秀才貢子洪至國朝康熙年廢寺以金粟房爲惠藥局忽生芝數莖紅如珊瑚褚蒼書有詩紀之